

道古堂文集

道古堂文集卷三十七

仁和 杭世駿 大宗撰

記事 諡議 祭文

彭無山遺事

彭鵬字奮斯號九峰福建莆田人九世祖漳江遷錢唐  
曾祖從野公文質復徙興化郡城之刺桐巷家世甲科  
清白相嬗從野公歷官廣西左叅政贈兵部左侍郎祖  
憲安廣東陽山令父汝柏處士鵬六歲授書處士晨夕  
抱置膝上方春晝暝以天時將作雨五字屬對卽應聲  
曰地氣欲爲雷聞者咋舌九歲操觚十歲山寇竊發圍

郡城大掠劫人要贖賊蔡某與處士有隙發卒圍其家處士他出得免又以孺子早慧必欲殺之復來圍室鵬登屋急走逃於族叔祖母牀下二日得免母戴孝于文學應禧女也告處士曰食盡矣稍延俱隕屢告輒呵阻一日處士宿從兄家母乘間黎明率鵬兄弟偕伯母伯兄潛出南關將奔錢唐祖居行未數里遇長髮二十餘人裹頭持械恫喝而上衆皆戰慄伏地有蟻姓者長矛衣甲後至呼曰老者家姑餘吾中表也乃釋之送至渠頭橋橋斷獨木爲梁鵬怖不前蟻姓負而渡旣渡乃言曰過此可無慮伯兄年二十餘剃頭短髮母泣懇護伯

兄至家蟻毅然無難色挈伯兄先衆緩步更闌迷失道  
蟻與伯兄返尋遇夜巡伯兄以短髮被執蟻亦受縛達  
旦始釋而彭氏家世姓名蟻初不知也蟻以救鵬母子  
兄弟寇遷怒逐之旋爲營丁所戕後鵬哭以文所謂吾  
母子兄弟伯母伯兄之命君生之而君之命吾母子兄  
弟伯母伯兄死之也而究不知其名也處士入自外室  
虛無人間道走南箕遇寇拘執文學吳某走賊壘請而  
脫之逃至吉蓼城陷從吉蓼潛至舍鵬與母亦稍稍聚  
寇跡知復來圍室無所之仍走吉蓼鵬從而後十歲兒  
徒跣八十里備嘗艱苦其時麥五兩一石處士自磨

麤作糜漿寢席濕鹵地夜不能寐爲人晝一袍購麥一斤八兩父子止一餐寇退始返躬自割麥日烈鵬持大葵扇隨母掃落葉代薪鵬負筐隨乳母俞誇於衆謂鵬爲非常兒爲人礪米線囊貯菓餌遠來啗兒赴童子試入城城中戚弗見彭氏貧無有舍鵬者俞嘗在沈家棲止攜鵬宿於沈鵬年十二弱小不勝衣遇試日五鼓俞襁至試場前門闔始去日午必竚俟襁而歸年二十試於學使者冠一軍順治庚子舉於鄉出永嘉王錫琯之門有國士之目錫琯時方李福清也康熙十三年靖南王耿逆以全閩叛幽總督范忠貞公承謨於請室橐鞬

從公入者城守營千總廖有功也以大義責逆力竭而  
死同日死者福州府知府王之儀建寧府同知喻三畏  
侯官縣知縣劉嘉猷繼此嬰城死於福寧鎮者總兵吳  
萬福也闔門死於漳州者巡海道陳啟泰也繫組死於  
不赴召者龍溪縣知縣李埏也范公以下七忠鵬嘗爲  
文祭之後皆爲之立傳閩中搢紳及舉人進士未銓授  
者逆檄僞州縣敦迫就道閩士耻爲之用進士葉有挺  
走山中經於古木朱翰春焚右股毒藥攻潰肉腐殆見  
骨舉人游標佯瘋劉渭龍麻衣徒跣以丁母艱免皆鵬  
密友也鵬猖狂臥病日啜綠豆一杯去渣存汁絕粒飲

水鬱爲枯腊僞曹院僞樞密僞都督僞布政節次檄催  
僞府縣僞同知僞縣丞親臨相視三年中死去二十五  
度或盡兩日夜灌以藥不甦炙以火不甦穿鑿牙關滴  
以湯水不甦魂歸白石山遇神僧稱本師其侍者郝頭  
陀稱渡和尚號以無山無山本師所命也處士遂削髮  
爲僧裝鵬臥牀千日逆平蹶然而起計凡五上春官人  
試者三不得已謁選人得三河令三河爲畿東劇邑旗  
民雜處驛路衝疲鵬至革火耗革陋規嚴保甲減驛累  
平冤獄建黌宮設義學禁拷索車夫之旗人詰冒充黃  
帶子之游棍實心任事不畏強禦 御前放鷹者至縣

使來索餼牽縶於庭鞭之藁鹽自矢有時絕糧然歷任一十四年降級者十有二議調者十議削者二聖明洞矚皆邀恩免巡撫于成龍特薦召對時問及家世并拒僞狀賜金嘉獎命吏部郎赫申兩日馳七百里口傳

上諭詢撫臣彭鵬爲人何如居官何如居官好處是如何好九卿列薦十一人大司馬李天馥啟奏鵬名

上曰朕召見久知之於一十二人中特簡四人鵬第一邵嗣堯陸隴其趙蒼璧皆御史鵬特以給事中用需次回籍卽家補授工科給事中時歲在甲戌會試充書



三房同考得士九人相國高文良公其倬其一也旋以  
原銜河工効力國帑絲毫勿預帑築大墩草壩等處挑  
濬帥家莊淤淺運行無悞秋濤齧隄止宿其上誓身同  
去畱以病乞歸不得請時

上親征準噶爾奉有爲國家公事捐馬卽與爾等本身  
出征効力相同之 旨捐馬二匹請以馬代身乞假暫  
歸旋以原官起用効奏元輔直聲震天下出爲貴州按  
察使有 詔過家上冢主僕行李裁二肩遷廣西布政  
使歷廣東巡撫

舊史曰錢唐馮景素仰重鵬聞諸客言鵬黃面白鬚而

齒盡禿遂附會其事云甲寅閩變賊欲污公公罵之賊  
怒擊齒盡落夫鵬居興化郡城逆據福州不相見也逆  
檄鵬鵬堅臥不起拒僞三狀見刻古愚心言中辭甚婉  
欵而致僞參軍僞治中僞郡守書皆以病未嘗一言抗  
也鵬示疾牀頭置錐穎客至省疾覲面藏指縫暗刺牙  
齧隨手見血含津液佯示血咯凡十餘日齒血涸竭牙  
齧崩露其事詳上其房師永嘉王錫琯書中齒禿之故  
以此此確證也景又言鵬爲給事中劾奏癸酉順天主  
考不公至請斧劈臣頭縣太學以謝士天下壯之按古  
愚心言訖於康熙丙子此言果實又在丙子前三年何

以不刻入心言中然以其目考之凡二十八類獨無奏  
疏意其奏疏未刻而景所見者即抄有無不敢決也

內翰李公遺事

李性麟字丹書號畏齋先世自棗強遷武定父之莊卽相國文襄公介弟也君幼稟至性生四歲遭母喪哭泣跪拜如成人康熙丙子舉於鄉丁丑捷南宮改庶吉士以省親請假旋里奉繼母病終夜不寢及居憂毀瘠幾不能起父感痰疾日事參苓量水稱藥十一年無惰容暨病亟請高僧息疑誦金剛經祈減已算旣捐館痛不欲生營度葬事雞斯徒跣逡巡風雪中遂得脚疾久之不瘳年三十七絕意仕進廣儲羣籍肆力其中開設義塾宏獎後進藉以成就者甚衆郡黌以積雨就頽命子

壽淵鳩工修葺視家之所有悉以充之以是樂輸者衆  
殿廡規制大備皆君所創也同郡袁熙宇天啟中以侍  
御劾逆璫與楊左諸公同死詔獄疏稿散失君搜輯爲  
一編攷其遺事爲之立傳又輯武定四賢集四賢者前  
都憲李伯淵總制劉範董少司馬史磐石及熙宇也又  
輯前黔藩吉甫馬公暨夫人邢氏遺文爲忠貞集以補  
志乘之闕與人交不輕爲然諾以急告不以亡爲解公  
安同年馬君來京謁選人負官逋百餘金檄至倉皇計  
無所出君檢篋中金盡以畀之聞風者競相協助事遂  
得解新城王思遠以唐山令解官後任某誣揭虧帑金

數千獄詞株連君爲走千里之順德力白於郡守卒雪  
其事姻家杜誠方援例大同所託非人侵捐項千餘金  
移原藉行追而誠方已物故孤子弱小求解於君君與  
曹君枚巖謀走使白諸當事責之代捐者俾完項累始  
釋霑邑宗人廸九教習在都猝遇疾惟一老僕從廸九  
握君手淚承睫不得語越五日卒君爲買槥躬視含斂  
斂金歸其骸前州牧壽爾康卒於官其子以帑累羈滯  
武定困頓不能自存君爲首倡買田以資其生不數年  
其子復病歿雙棺厝孤廟中君歲時必祭卒還其喪卽  
墨同年黃長文司教武定薪米恒不繼及憂去貧無以

行君經理其歸裝女櫬寄荒祠中復捐地葬之信邑馮  
盛章五十無子買妾有成議懼爲宵小所乘藉君力獲  
娶歸連舉二子州牧何去州有民欠借穀若干君代認  
五十石是歲歉收穀價踊貴遂竭薄田所入交納一時  
人士慕義捐補倉項遂清君復資以薪水何藉是得免  
里吏議霑邑同年任瀘溪令罷官欠庫銀售產不足以  
償君力拯之於危急之中割田以贖其子家室保完泗  
源季君任州倅歸家計蕩然晚歲益困君時其饑寒兼  
賙其後人君承先世積累見義必爲不計力不問家所  
贏餘嘗曰若必待從容吾家世清白何時從容耶方癸

未歲大饑道殣相望君之父兄爲鬻以食餓者君躬稽  
米薪徧給之凡三月全活者逾二萬人病者有醫死者  
有殯葬埋之費不他求歲甲申疫大作鈔錄奇方製金  
不換膏朔望施給歲辛丑旱甚君齋宿三學寺爲文牒  
龍神越二日甘雨立霑邑遭兵燹後城隍多遺骸夏雨  
暴漲白骨暴露君于寒食中元節令人繞郭檢拾南門  
外義塚纍纍皆是也諸子皆克自樹立君教之嚴而有  
法壽彭爲介休令輯居官要箴一書俾令時時省覽邑  
當衝道辦軍需者歲無寧暑用度至不給家人東歸無  
以爲甘旨奉君爲之邑喜曰居官有貧聲此是好消息



吾無憂矣孫本樟成進士任刑部主事貽書戒之曰西  
曹刑名總滙民命至重有纖毫可原者務求其生路勿  
妄逞意見也晚年於所居齋右疏泉架石構亭其上自  
號怡山老人親知入社者皆耆年碩德周覽名勝極林  
泉之樂事預刻死期神明清湛不亂山左尙德厲行之  
士至今以李氏爲法

書趙氏老婢事

吾姻親趙氏有老婢年七十餘雍正甲寅之五月以老疾死吾妹以書來請曰婢終其身不肯嫁爲人婦志甚烈事甚奇無人告於有司以求旌其志行且於例當不得旌兄以鴻筆提獎幽隱曷念其不久將泯滅假之片詞庶藉以有聞乎予曰惡是烏得以泯滅也寡婦之莎貞女之木其精氣光怪尙將寄託之冥漠頑蠢之物以發抒其志意矧其撐拄於人世者六七十年之久而與草木卒同腐朽焉於理無是也雖然吾知而不爲之記則於吾爲不仁而吾旻爲滋大按婢失其姓少鬻於趙

氏始有名繼而趙氏愍其節且祖若父所畜也輟不忍呼則呼之曰老阿姐云方其十五六時有以珞璣子之學干趙氏者趙氏則戲爲婢算其人曰噫是何祿命也是殆將七易其夫而後已者衆皆笑而譁而婢頸赤面發熱氣結不得語已則仰天而呼曰嗟乎吾嫁則有夫吾有夫則有死吾今且不嫁爲之夫者誰耶自是蓬首垢面敝衣以自韜晦媒氏至詈罵詬誶不可近主人申誨之則搶首乞哀願終役事無他適已而察其志堅廼相與聽之趙氏有婚嫁之事婢匿避空室不肯與過新房匍足彳亍不肯前客自外至蒙而瞇目不肯視辨色

而興治餽醢供灑掃夜則燭滅然後敢息其勤又若此  
旣病主人量藥劑主婦奉湯餌視惟謹縣愷將絕氣老  
稚皆行哭失聲櫬殯衾斂悉從厚謀將葬於祖兆之域  
外立碣以表比於王大令爲保母李意如壙志例杭子  
曰若婢者所謂潔其身者耶在易睽之彖云男女睽而  
其志通婢不爲六二之遇主而爲九四之睽孤不婚不  
媾比於天且劓有過之焉以于巷有鑽穴踰牆之羞而  
不求厥孚交如之吉有張弧無脫弧婢可謂嚴於律身  
矣昔吾邑李貞女旣納采而夫死女往哭成婦禮歸而  
守志以節終蕭山毛檢討奇齡爲紀其事又有貞女莫

勝儒父老兄客於外女誓不嫁養父以孝終官爲綽楔  
表其間婢則非節非孝無所爲而爲之若古潭止水之  
不可汨而濁若勁柯堅節之不可撓而折若曾冰積鐵  
之不可斲而玩食苦茹澹忍嗜慾滅天性證之於禮經  
則不合求之於史傳則無可比類乃其志則名門大族  
閨穉賢媛之所勉彊以力持之者而竟得之於臧獲侮  
甬之賤嗚呼其尤難能而可貴也已

孝隱先生諡議

唐王勃有言人子不可不知醫自程朱大儒莫不宗尙斯言而金源張子和至本之以著書嗣後醫家之以事親養老名編者何啻數十輩嗟乎醫之繫於至行固若是哉錢塘唐梅崖先生名應文字聖緯以國醫起死人無算雍正四年以末疾卒於里旣卒哭門人故友私議易名之典杭子曰先生以醫隱者也其得不謂之孝乎方先生以母病故自料醫劑遂通方書求之前史齊若李元忠若李密隋若許道幼若王通唐若甄權若杜鵬舉率同斯意皆以孝顯名天下今請以之諡先生庶幾

其不愧歟然而先生之訓其子樞也顧令之終爲儒而不少試於醫者何也蓋先生之以考終也以疾不以知醫免當革時樞亦服膺於庭訓博習於方書傍求於衆醫之推治數定而術窮焉如王勃所云云者固不可以爲樞責耳矣且使樞攻其術而善固不能保先生以必生若攻其術而不善其弊將至於殺人是徒知知醫者之乃可爲孝而不知不善用者竟可入於不孝而并可陷他人之子之委於庸醫者爲尤不孝此固仁人君子之所不敢出也然則先生之禁樞不得爲醫者慎也蓋其孝也嗚呼此其爲先生之醫也歟謹識

孝貞先生諡議

諡美號也王公卿相積功累行議之太常定之禮官傳之國史輝之家乘播之士大夫之口斯國家酬庸之盛典人臣不世之榮遇矣然而美惡緣於恩讐是非由其愛憎運會遷移山邱零落求其確然可切指者蓋百不得其一二焉則勢力之難久憑而鴻名之不可謬假也乃若匹夫爲善闇然日章澆俗薰而醇醲驚獸感而援伏樹烏頭之闕標獨行之傳哲人旣萎物論不移門生制其心喪朋友弔加麻服或以限於名位格於朝典揚名則孝子心瞿覈行則鄉邦神悚肇源炎季下逮齊梁



輒以名終進加私諡蓋猶行古之道也嗚呼江介爲宇  
內之神臯吳越乃生民之陸海余嘗推原至隱題目人  
倫數窮星回水落霜降曩昔聲華絢爛之志悉已濯然  
剝盡惟忠孝淳深煌煌燁燁冠冕百氏煜耀兩儀以余  
所聞則休陽汪先生天石其一矣先生幼挺異質歿爲  
完人色養偏親德動

天聽舐目而銀海還光隄疾而綿疴有喜浣萬石之中  
翬攀王衷之墓柏其淳至也如此其昭明也如彼天不  
憖遺祥禪俄及百族之英一黷之雋褻衣戟冠肅乎其  
容偉乎其儀造廬而言曰日月逾邁窅窅旣卜先生之

行終矣請所以易其名者余應之曰驚爆之行不可以  
章久遠榮華之辭不可以揭懿美我聞在昔言必稱先  
周書云大慮克就曰貞先生愛敬徵於明發孺慕迄於  
終身以云克就則誠克就也可不謂貞乎秉德不回曰  
孝先生視聽謹於形聲血泣綿於霜露以云不回則誠  
不回也可不謂孝乎乾有四德而以貞終士有百行而  
孝爲大非貞則孝有時而衰非孝則貞或流於諒析之  
則徑術自分合之則天德尤粹請謚先生爲貞孝可乎  
言未旣蹶然以興應若雷動黎收而前席曰允矣乎夫  
子之言也余曰未也人紀有圭臬論議有元本傳記二

百一十七部表孝德者凡九列史二十三家傳孝友者  
一十有五私議之興我其以匹夫而干王制乎而以先  
生當之斯固表微者之創體而賓實者之特例也不詢  
之故老則無以信今不命之惇史則無以傳後鄙人不  
敏嘗學乎舊史氏矣執簡記以發幽光嗚呼有不得而  
辭其責者夫謹議

祭沈端恪公文

某曲學所習瞶昧所守不揣固陋猥以螻青儷白瑯刻藻繪之文就公評隲公時家居衍濂洛關閩之派識老學博薏薏之說若稊稂之昧目固宜爲公所鄙斥不省公匪惟不之見絕且命兒子傳鈔弄之篋衍展翫以爲愉快與客言則深嘉而亟與之嗚呼某何人斯而得此於公哉繼某獲充鄉貢計車北僭阻水於齊魯之郊崎嶇險阻僅而得達公日盼其至寓書問訊者再夫公方佐

聖天子掌邦治夙夜在公日昃不暇食而於閭巷小生

卷之三  
奉拳不置若此此寒峻之儒所爲感知已之遇鏤心銘  
背而不能以須臾釋者也旣來京師謁公於 賜第某  
以爲發策決科之道公必有以提耳而教之而公所言  
顧在於修身行已之大端蒞官臨政經世服物之重務  
而後知公之所期於某者匪徒博春官入秘苑以取榮  
鄉里而已嗚呼哀哉公今死矣某敢少自墮落以負公  
哉剛簡勁正之氣所以肩聖賢之道而世以爲遺俗而  
忤物博學明辨之力所以明聖賢之旨而世以爲揚已  
而露才脂韋澳濁之習循誦習傳之陋當時以爲可喜  
固學士所羞而公所不屑教也方公之生某旣不能自

奮於功名以慰公之望迨公之歿某能不強勉於學問  
以副公之知故凡涕泗漣洏熾夫幼兒之所以致其感  
激之私者某不忍抑情以異衆而公之休光美譽歷百  
世而未有艾者乃公後人之冠服牆宇某敢不相切礪  
以要其終公於鄉里爲耆儒於朝廷爲名德當世必  
有提鴻筆而大書之者某之所以哭公則固一人知己  
之私而不足以爲公重也嗚呼哀哉尙式鑒之

祭孫澹齋先生文

嗚呼逝水不還奔曦長騁喬樹摧柯客星墮景雞黍談  
元鳩空祝哽鈴閣文孫哀踰柴穎巍巍祖德敬述平生  
曰翁至行數難僕更孝於嚴慈友於俊兄割宅成讓循  
陔補笙少旣居貧牽蘿葺薜不作苟見不治苟得蜀嚴  
湛冥德林元默侃侃自將詎因蒲帛翁性溫慎斷金以  
交嗤彼世路譬猶堂坳芥則爲舟置杯則膠豈如千頃  
汪汪不殺富以多文亦兼媚學書填蠶尾經挂牛角天  
機渾渾無事表襮出以用世定見恢倬南踰湘嶺爰暨  
無諸豫章九江八桂三衢忽若彗汜又似畫塗到則躡

履坐則勅厨賢子才大將充秋賦出門西笑霏霏蘭路  
仇以二豎淚灑醫樹翁適來京庇其斂具或謂孝感或  
謂慈恩真性兩契聿徵淳源西河失子半千有孫鸞鵲  
鳳翥遂大厥門香惹宮袍燄分綾餅視艸蓬池讀書蘭  
省經術紛綸文章蔚炳天骨森尊欽其峻整嶠陝慕義  
帝德誕敷奉使徧諭唐蒙相如口吐王制乘四傳車叱  
俗烝烝

帝嘉用俞翁方含飴城東小築畫棧瓜疇梧堂竹閣夕  
史朝經左圖右洛書撰癸辛寓名安樂故人佐郡吳城  
之胡赤蹠尺一將伯是呼弊樟擢秀疊阜憑廬石梁僊



館尙來遊乎于時弭楫沙稜波齒暮景沈峯衰顏照水  
藥嗇金膏醫瘳石髓非龍非蛇災我處士袁惟景倩鄭  
號小同麻衣纚纚鹿埤東籠黃腸題湊宅乎幽宮千里  
匍匐庶幾慎終惟翁德厚飲如醇耐報不其身乃昌厥  
後麗牲穹碑巋巋琢鏤衿山帶川垂爾寶胄緇塵堀堞  
風翳廣庭設位望哭薦闕芳馨浙河渺瀰吳根窈冥仿  
招大小以告芻靈

代祭楊母徐太君文

嗚呼清湖水緩姑蔑城懸江花慘雨山月薶烟鄰無春  
相里罷社錢禮宗不再閭閻誰傳維時使君方羈官舍  
恤隱通商布濩洪化白衣急足城人驚詫繼聞號咷訃  
音東下純孝肝摧心如聚灰勺不入口踊無剩哀設祭  
想魂痛猶棄孩髧然骨立不知饑飢苦塊枝柱聖廬幽  
窳爲無訾省坐風當雨朝昧辰堆夜譌衙鼓神藥形茹  
面務眉斧削牘茺蘭陳情上官以俟受代素壁挂冠括  
髮徒跣踏谷超轡牽帷睇影用殺哀湍君有美政朗如  
泉鏡井烟萬戶愛其淳勁君今失母衆母誰更傾壘罷

肆洶洶滿聽

天子上聞愍此惻歎期借舜軌遄飛堯文吏有子喪奈何奪情勉從民請以彰潔清匪惟主印又予虞殯雨濯衣鞞塵撲眉鬢古障蹄疾直沽槨潤迴望黃腸星奔電訊儲淚一升霑灑漆鐙便房風淒靈牀月侵壽萱萎榮慈竹失陰靜緬母儀不能奮興爰念惻子蚤背慈氏濕哭乾啼顰眉摘耳上索下求左坊右里卒歲含辛更無恩紀維時太母初嬪屏軒南都名族高士重孫愛日冬暖柔顏春溫煦嫗覆育不可殫論雅髻青梳靡煤紅篆畫荻教書咒桃顛而賜餌分甘縫袍折綫刀尺劬勞風

綵雨翦高木莎城山舍佳晴牽絲玉轉轅轅金聲鳴儀  
鳥哺飴炙芋羹三衢文會鞭策聰明子膺仙賞墨題璇  
榜彩選金門藤花一丈天網羅賢論居三上捧檄南行  
遂忘鞅掌花縣紅肥大車毳衣馬羊金粟絕其因依俗  
畱遺愛吏懾餘威三年報最績著循蜚旋荷 恩燾喜  
盈鶴貌別母東來分符坐嘯潔耻鮓封清餘棗料圓首  
芸芸待資啄菹自擁彤襜幾歷星蟾千里太末問安發  
奩老人動靜徵諸鳥占健尙加飯笑溢口髯齊濱東嶠  
霜排雪界煮海鮫宮熬波蜃竈維師尙父構有洪造子  
領辜權牢盆屢効翟翬有燦耀于鴻案扶杖珠臯挽車

金岸鶴髮雙番松年比竿石乳砂牀紅泉玉炭云胡蒼  
昊降割遽臻絳紗輟講玉白受辛逍遙媧石騰駕娥輪  
揮手謝世返乎雲津嗚呼太母翕登霞首燭暗屏帷  
校簾牖豈無靈祀占星醮斗豈無上藥苓龜杞狗母兮  
長辭恩洽鴻私廚婦淒靈椎奴綆縻宗姬承曉里母持  
頤况隔齊越嬌兒袞師某等分有鄉情職參寮雅行悉  
允熊禮慙賄馬惻惻哀詞吳綾橫寫髣髴瑤聯視茲豐  
畢

道古堂文集卷三十八

仁和 杭世駿 大宗撰

狀 行狀

移志局理學名儒柴先生狀

先生姓柴氏名紹炳字虎臣晚號省軒先世自學士士宗由汴徙杭著籍仁和祖祥明嘉靖丙辰進士江西道監察御史父應權以明經爲興化學博卒於官先生自聞遞父棺以歸特貧甚依伯兄紹然以居露濡霜降輒踉蹌走墓門號哭松楸間里有父咎出亡者遇先生於道譬之曰吾今欲求父杖難可得爾乃避乎爲賦遊子

遇孤兒行一章其人卒改悔爲孝子先生爲文師葛學  
使寅亮已入學宮爲弟子員與同里汪颯應撫謙陳廷  
會以古學相切厲雲閒陳人中時司理紹興見其文大  
加推獎爲序其青鳳集由是日益有名明社旣屋執友  
若吳公麟瑞劉公宗周倪公元璐黃公道周皆先後死  
國先生乃依東漢宋子浚等爲郭有道服心喪期年之  
例爲位哭於都亭遂棄諸生歸隱南屏業醫自給其學  
自天文輿地律歷典禮農田水利兵制賦役無不涉其  
崖畧而於音韻翻切尤精凡騷賦詩歌有韻之言穿穴  
佐證旁推交通一一指數其異同離合著古韻通八卷

其首辨沈約孫愐及宋禮部韻畧之沿流其次辨部第  
斷限并入聲部次異同其次辨全通半通閒通旁通之  
四例大旨謂古韻不立轉通古音不可妄叶古今韻有  
繁簡而聲文有遞變同時若崑山顧氏錢唐毛氏皆以  
音學之書名天下先生嘗掎摭其疵病寓書往復以救  
正之兩家無以難也又倣黃門顏氏例作家誠二十篇  
羣從子姓雖宦成歸里或年長於先生者朝夕繼見莫  
不綦息屏氣肅若嚴君著省過錄明理論發明有宋五  
子之學康熙己酉 詔舉山林隱逸之士巡撫范忠貞  
公將薦之朝力辭乃已又請刻其所著書謙讓不敢自



信范歎息而止卒時年五十有五巡撫趙士麟督學王  
揆檄所司祀之鄉賢明年葬西湖之花家圩學使周公  
清原題其墓曰崇祀理學名儒省軒柴先生墓所著有  
省軒文鈔十二卷通考纂畧十卷刊行省軒詩鈔二十  
卷白石軒雜藁八卷切韻復古編四卷藏於家

刑部右侍郎王公行狀

曾祖某副榜貢生山西汾州府同知

祖某庠生贈通議大夫內閣學士

考某贈通議大夫內閣學士妣賈氏傅氏贈淑人繼

妣戴氏封淑人

本貫直隸河間府交河縣年五十八歲

公名蘭生字振聲一字坦齋幼端凝喜問學誦朱子易

本義不遺一字安溪李文貞公督學畿輔拔置縣學爲

諸生遂稟學焉益自刻厲研極性命之理自樂律音韻

旁及中西象數莫不深造從文貞公修朱子全書冥心

編校敦學相長泊然於聲利榮祿之外者十有三年  
聖祖仁皇帝問士於文貞文貞首以公薦 名直 內  
廷晝日三接歲癸巳

命與舉人一體會試九月蒙養齋開局與編修纂事旋  
以父病乞假歸丁憂方持重服 召赴熱河 行在復  
以母病請急有

旨命將韻書帶回就家纂輯蓋異數也服闋復赴書局  
日侍 講殿祇承 顧問辰入酉歸不間寒暑歲辛丑  
試禮部不利

賜一體殿試以二甲第一名進士改庶吉士充武英殿

總裁纂修駢字類編子史精華是年冬

世宗憲皇帝嗣位以內廷近臣例邀錫賚嗣散館授

翰林院編修雍正三年四月奉

旨凡諸館有律呂門目者俱著會同修纂旋

命署國子監司業事明年出典廣東鄉試爲正考官未  
報實授司業俄有提督浙江學政之命面乞便道省  
親五年擢翰林院侍講六年轉侍讀七年晉侍讀學士  
調安徽學政九年擢內閣學士兼禮部侍郎十年以安  
徽學政復畱卽充江南鄉試正考官以學使典鄉闈前  
此未有有之自公始復調陝西學政公清介絕俗苞苴

干謁不戒自遠愛士如子弟頒示文貞公遺書經說使諸生知所誦法凡奇才孤學通知陰陽歷術者必提掇獎成之故主三大省學政興賢育才鼓舞淹滯青衿組帶之士彬彬郁郁莫不願出門下迄今誦說不衰十三年以事挂吏議左遷少詹事

今上皇帝登極之初首蒙擢用卽補原官充乾隆元年殿試讀卷官旋充三禮館副總裁晉刑部右侍郎管禮部侍郎事三年二月二十二日隨駕奉安

山陵行次良鄉謁履親王於幄次爲具食飲談論如平時夜畱宿幄中明早肩輿卽路及午從者有所白憑伏

不能應履親王卽以上聞遽命太醫診視而公已不可復藥矣

聖心閔悼嗟歎者久之賜帑金五百兩命直隸督臣監設喪事停棺涿州以待家人奔赴焉公性畏慎周密出入禁闥二十餘年深爲

三朝所信遇科第皆出自

聖祖特恩一則曰王蘭生爲人正所學亦好再則曰王蘭生朕深知其學問

憲皇帝御宇十三年由庶常拔擢至卿貳

今皇帝方隆重寄而年不躋中壽不得大其設施命也

操守廉潔俸祿之八半以給周親密友薄田數畝纔給  
饘粥所居數椽不蔽風雨自列九卿未嘗有尺寸之益  
宗支衰落一弟以哭公故逾時而歿繼母在堂年逾七  
十哀公無子以族子誠繼公嗣承廕公學不爲泛濫其  
於樂律如有神契朱子琴律圖說一篇字多譌謬公以  
意詳正瞭然可曉文貞公用以進 御深被嘉賞入直  
時恒得

聖祖指授本明道之說以人之中聲定黃鍾之管積黍  
以驗之展轉生十二律皆與古法合又謂弦音祇爭長  
短或用倍或用半其聲可以相應管音則有長短巨細

之差故有黃鍾積八倍者或四倍者而匏笙之管反有  
用黃鍾積八分之一者至塤箎之類亦皆以黃鍾積實  
加減而得其應聲蓋綫與綫體與體之比例異故也其  
說稍變朱蔡而實與管子淮南之說合嘗謂世所傳等  
韻書清濁未分元聲不辨邵子經世詳等而略韻顧氏  
音學五書詳韻而略等皆未極其至及奉勅編纂棄  
短取長用國書五字類爲聲音之元以定韻又用連  
音爲紐均之法以定等書成

世宗賜名音韻闡微非大臣未嘗叨賜焉他如律呂  
正義數理精蘊卜筮精蘊凡與編校者皆一時之選至



律呂音韻必以公之論折中其學獨是莫知唯

聖君賢相君臣道合冥契於天人之際而公以一介儒  
生叅其間而承 恩顧可不謂難得之遇哉公娶於賀  
儒學彭年女有三女二適士族一未字某與公先後入  
館悉公之蘊畜重公之介特哀公之卒然以死而血胤  
之無續也誠以公行事來告因綜次之如左謹狀

侍讀鄭公行狀

公姓鄭氏名江字璣尺晚號筠谷先世自唐時家於歙後遷浦江是爲義門由浦江遷餘姚之眉山曾祖少南以授經來錢唐娶於趙遂家焉祖應科父茂坤皆以公貴贈儒林郎公生有異稟五歲時卽知以海參屬對山藥九歲學爲詩未弱冠爲諸生試輒高等家遭回祿勢中落藉教授以奉堂上之養得其歡心癸巳萬壽特恩開科以禮經魁其房是年試禮部不利畱京師學時文於長洲何翰林焯主大司農華亭王公家分修詩書兩經傳說彙纂戊戌成進士改庶常明年終養回籍旋

居父憂未嘗一飾竿牘干當事時高安朱文端公方撫浙不肯一往文端公以此見賞逮公服闋方補卽薦校順天鄉試徐尙書元夢敎習庶常館試輒列公一等因奏充明史館纂修官是年以鄉試校閱公明議叙授檢討復丁母憂歸里巡撫李敏達公聘主敷文書院講席課士有法始分生童校試日期終日危坐堂上嚴絕代倩傳遞之弊頗有以賄求錄者痛斥之最激賞者周玉章吳嗣富陸秩胡際泰卽連掇科第以去錢唐龔鑑以經學見契於公公尤重其學行果以選拔出宰甘泉頗著惠政服闋入詞館大宗伯吳縣吳文恪公奏充大

清一統志纂修官文恪卒大宗伯溧陽任公少宗伯桐城方公總裁志局少宗伯見公文深相折服因以志事見屬時纂修者雖衆獨公與常熟王侍御峻屬筆爲多壬子復分校京闈甲寅晉右春坊右贊善桐城相國薦公能爲古文

憲廟面諭有鄭江老實之旨乙卯爲典試事慎簡儒學之臣公在選同引見者皆歷詢履歷至公獨不復問唯詢諸省文風孰優桐城相國以山左對卽

命公往蓋受知有素矣公旣承

恩命矢竭公慎殫心校士非極荒謬者必閱至終篇援

筆點勘右腕幾脫竟以左筆終事搜剔落卷纖悉靡有  
遺憾闡中雖給事僕役莫不感歎試歸 恩命復使視  
學安徽躬親校閱標清真雅正之文爲正鵠險詭者概  
從斥落風習爲之一變嘗謂入泮爲士子進身之始前  
茅廩餼所關敢不盡心乎檄州縣以廩餼對抵錢糧無  
糧者爲任親友抵納免出入耗折之患遇有案牘尤畱  
心究切青陽有娶未婚族孀之武生已廉其實縣令再  
三請貸卒治其罪而離其昏盱貽袁生以祖任縣令時  
後官擔代銀兩與制府有私親檄州牧視其衿公相俸  
率錢代償而袁生不果黜巢縣監生樊珍以爭產誣其

弟婦單氏及已昏姪女樊氏與隣人趙生通公閱牘而疑之下縣縣令受樊珍珠實其事通姦無所據惟以樊氏所執詩扇爲證佐則趙生所書唐人句也蓋趙生與單氏子兆賓同學是夏趙生書此扇單氏母女偶執之實無他公以縣審不實駁之督撫檄無爲州牧覆審州牧前嘗以私書瀆公因私憾欲妄褫一生公不答而下府平反其事因是與公有隙欲借以傾公謗公受兆賓賄逮公役往質太守意不直之而公心跡始白然單氏母女之冤猶未白也公按試至廬力左之復言之撫軍先後兩臬司皆與公意合其事得釋而樊氏之舅諸生

陳案因欲出樊氏公檄至面諭之得以完聚使節所泣  
凡名德之後貧弱不克自振者必委曲成全之諸生通  
古學者尤引進不倦陶敬信之通經江有龍之史學皆  
特疏薦於朝有龍以親老辭敬信獻所著書闕下  
與修三禮人皆服公之能知人也秩滿晉侍讀召對  
詢以方面大吏及所過地方情形次及江左人文屢蒙  
溫諭仍充明史綱目館纂修官公在江北時池州各屬  
地苦卑濕一雨則堂室皆水苔情愔生榻上公久坐蒸  
濕中迨反命冒暑載馳熱雨蒸爍居一年足遂不良  
於行乞告回籍調理掌院固留公且欲借修書爲公養

疾之地公以食祿不朝賀非臣子禮力辭歸同館諸公  
祖帳都門外人賦一詩贈行數十年僅事也公所學無  
不貫尤邃於經謂春秋爲宣聖性命之文而三傳未能  
發明非啖趙孫劉諸大儒則聖經或幾乎晦武夷胡氏  
頗以已意武斷迂泛不切者不可殫述晚集諸家之說  
爲春秋集義二十卷穿穴根據不第爲胡氏諍臣也又  
爲詩經集詁四卷禮記集注二卷與修明史時有明志  
稿六卷明太祖本紀八卷列傳十卷修綱目時有明綱  
目三卷少學詩於同里洪稗畦中凡數變卒歸醇雅晚  
與里中諸宿老結南屏之社而公獨絕去破碎鬼瑣之



習已刻筠谷詩鈔七卷余嘗承公命爲之序未刻者有書帶草堂詩鈔三十三卷文集八卷賦四六共一卷詞一卷其他若析醒錄三卷粵東紀遊一卷則公之雜著也公和而介通而有守官庶常時修冢宰方摠庶政同年薦公入幕不就或嗤其迂已而修敗友人獲交于年太保爲公先容勸作詩以頌功德笑而不應方侍郎薦公於果邸公力辭西林相國會薦公肇高雷廉學政終未嘗私謁通名仍用後輩禮不敢妄附門生之籍身旣通貴布衣之交四十年如一日後進有雋才折行輩接之稱說不去口余之交於公也時方踰冠而公已爲巨

人長德歡然握手若昆弟暨余通籍而公又爲館中前輩片言之美一字之疑虛已下詢執禮如末學小生而不知涓流之不可以益河海撮土之不可以加泰山也公子之翀特令執經余門公旣彌留而之翀會試在京師遺言必乞余一言定公生平之行狀嗚呼余爲荒廢頽落之人公獨略去勢分而有所取焉豈非以其質正而不肯阿所好乎公疽發於頸血氣漸耗屢下不止疾旣亟尙索紙作買棺寫真二詩比至屬續神明不亂蓋其養有素也公生於康熙壬戌二月二十六日終於乾隆乙丑二月二十九日春秋六十有四

勅授文林郎再授儒林郎例授奉直大夫公之階也娶  
於陳封孺人例晉安人男子子三長卽之翀乾隆辛酉  
舉人次之莊次之開繼弟明彥爲後女子子一適太學  
生傅庭芝明彥遺一女公撫之如已出亦嫁士族太歲  
在丙寅子月晦之翀將葬公於桃源嶺青芝塢之原幽  
宮之銘伐石有待匍匐稽顙件繫行事丐余筆授以竟  
先人之志是不可辭也謹狀

涿州知州許君行狀

曾祖考可元歙縣歲貢生

祖考得全歙縣廩生

考琮江寧歲貢生封承德郎

今天子紀號之元載起潛震蟄收擢才儔與之更始前  
涿州守江寧許君家居者蓋六年矣踴躍

聖化走京師投狀請自效執法司憲之重臣察其辭直  
俾得覲見

天子有日無何許君適以疾告越明年竟卒邸舍其孤  
天成將以喪歸匍匐余庭口述先人遺事請爲行狀狀

日君諱恒字司貞號北山系出唐忠臣遠後世居徽州歙縣之許村自君封公宗玉公始遷江寧遂爲江寧人宗玉公娶余太君生丈夫子二人繼室程太君又舉子二君其第三子也幼而岐嶷端厚不佻及長性識練達措意經世之務入太學循例謁選人授江西建昌府通判甫蒞任值南安府砂夫梗化兇鋒方熾往救捕者輒爲所挫撫軍廉君才俾率兵士進剿君以計攜其黨乘其怠擊之旬日而平未幾府治城鄉同日蛟發水湧十數丈遭漂溺者呼號徹聽君亟命人吏恣與之金不問安人翁亦徹環瑱以助招徠舟人得船大小九十餘艘

救回漂流者四百二十餘人生全者三千餘口渡送天一山蓋茅安處炊糜給廩民得恃以全活水退更爲修葺廬舍復獲安堵康熙五十七年調判湖南永州檄赴長沙執季執季者當時所定之名於府佐中擇一二賢員以當司臬臂指之使者也君天性豈弟能盡心於庶獄七府二州填牢戶籍以開釋者不可僕數而匿名爭水兩重獄尤倚君以全妖僧有爲背逆帖子者揭于通衢索其人不獲撫軍怒甚飭長沙善化二令必訪致之城僧千衆皆坐幽繫敲朴無虛日君謁軍門請以身肩其獄日就僧鑒辨辭色卽於衆中得造謀者千僧一時

盡脫桎梏泣爲許使君立主尸祝諸寺至今不衰五十九年攝善化縣事歸塘李陳兩姓以爭水利致殺人禁囹圄者六十餘人案懸七年不結瘐死者七人矣文書盈尺君用情閱實寢不脅席者兩晝夜庭引諸囚謂之曰獄有首有從律有矜有疑若以鬪鬪細故株連蔓衍至數年不解父母妻子皆日引領生還但得一人首服其事卽冰釋矧就坐尚有矜全之路耶余爲民上誠不忍效前事者濫刑懾汝伏蓋自陳乎爲之歔歔掩泣淚沈瀾几案閒衆囚感動慷慨引伏盡得其狀收其兇首餘並請於軍門開圜扉而縱之兩村父老焚香踵門祝

使君長壽者走數十里不絕雍正三年兼攝府事本屬  
江華永明道等州縣地界苗疆跳刀走戟閒有竊發君  
草上移鎮駐兵彈壓巡防之議不果行後卒有荆之寶  
之變始移兵駐守如所議六年銅斤解京例得引見  
憲皇帝諭旨褒嘉晉任順天府涿州知州十二月十九  
日朝於 乾清宮跪請

聖訓溫綸勉勵至數千言有香貂珍藥乳茶克食之賜  
恩遇稠疊君益感勉奮發治涿未匝月循聲四播俄以  
前在湖南時屬員有諱盜者牽連及君

上置不問以北南大道夏秋積水爲行旅者所畏發帑



修塾在君境內者部定修寬二丈君更增廣五尺皆解私橐爲之蓋藉此以仰荅

知遇而督臣不察猥以違制累民挂君吏議而君遂自此解組歸矣君服官三十年勤勞在職殫厥心膂凡四督漕運一護京餉一解銅斤一送軍糈抵紫荊關在建昌攝縣事者三曰宜黃曰新建曰新城攝府事者一曰吉安在永州攝縣事者二曰善化曰零陵兼攝府事及郴州皆以興學校課農桑鋤奸振滯宣導聖化爲要務修建橋梁民不病涉今宜黃之通濟石橋及永州西門之浮橋皆君所創也君至性友悌初服官先人田宅

卽推與弱弟歸田後空囊不名一錢假屋而居日事影  
質口不言析產事晚歲築室鳳皇臺左授書諸孫與人  
樂易無疾言遽色束帶終日家人儼若嚴賓爲鄉里所  
取則君生於康熙八年某月日卒於乾隆二年某月日  
春秋六十有八娶於翁同縣明經象賢公女 覃恩封  
安人先君十年卒子男二天成天一天成娶於如臯高  
氏天一娶於上元譚氏天一先君早卒女子子一嫁海  
寧陳克敏孫男一懋余之託襟契於君也從君族弟端  
余重君老成貞淳敦樸之氣襲余懷而不能釋且以天  
成之爲能嗣君并欲傳君是不可以辭也謹狀

朱秋圃先生行狀

先生名元文初名允文字開武號秋圃系出山陰史氏  
五世祖愛洲公來遷於杭遂爲仁和人曾祖恒度公蒙  
外家姓乃以朱爲氏氏朱者訖先生凡四世先生生有  
異稟垂髫爲文操管立就淩紙恠發雖大師耆儒往往  
爲所驚懾天性悅學功苦非人所能明而動燭入不肯  
休倦矧不支繫髮於枕轉側卽覺十年以爲常國家  
旣定舟山改舊昌國州爲定海時學校初立青衿錦帶  
皆樸邀不任俎豆招徠他邑士任開墾者得隸籍楚黃  
張侍講希良故出固陵毛檢討門號稱知人能得士先

生航海應名褭爲選首嗣後四方文士輻湊其邑高才  
生多出其中定雖新邑文學乃與勾甬諸大縣甲乙爭  
長而先生屈試必往往輒傾其曹偶一郡士皆側目夫  
士入黌舍挾徑尺之書守一先生之學餽虞庠之米廩  
則裁冠濶步矜號名碩此柳子厚所以致誚於黔驢而  
太史公所謂夜郎王不知漢廣大者也先生深用爲耻  
厚自抑損精學家巷杜門簡交游教授諸生咸有程法  
其致力也深以果蓋有異於世之號爲經儒者南陽彭  
侍講始搏禹峰先生家嗣也博瞻爲詞館所推挹視學  
澗河意欲得淹洽閎麗之文樹之正鵠以振時習之空

陋手先生文循諷以號于衆亟曰國士國士庭中人熟  
視屏氣無敢譁者刊其文以爲矜式朝傳夕徧不脛而  
走大江南北莫不以能文者名朱先生吳中何翰林焯  
持文律甚嚴所摘撫不避權力制舉士所謂龍門也還  
淳方先生槩如選於經術以名進士令豐潤罷畱京師  
斯夕過何數士及浙省何舉金虞方稱先生當之何曰  
奚似曰似西安方孟旋雖然以沈實則孟旋不似也旣  
而臨川李侍郎來主秋試先生名在薦中不及錄歸而  
翰林往訊曰君其得金虞而失朱某則是役也功與過  
讐歲辛丑充貢詣京師橫翔捷出譽滿太學劉司成師

恕沈司業翼機交相推重謂六堂課第不宜以第二流處是生歲丙午晉江陳詹事萬策典浙省試事先生兩試京兆皆不遇困而歸歸益鏤厲爲學行文高壯廣厚益醇以肆嘉興令程君屏山見其文驚詫絕異亟以第一人薦榜既定名在第八詹事曰余非抑置是生也曩者余嘗以是魁閩省使衣鉢可傳吾且屬之矣大凡先生之文知者或愛之入骨髓掉之以輕心或望洋而不得其涯試于庠序學校必求其位置之地環覽雜誦味乃如炙車轂而愈出鎖闥而易書目眴唇燥煩昏鬱悶之餘或且覲面而失之以故提筆入鄉闈失十而得一

來禮部試三薦三不見收此果時命主之耶今年春上海朱翰林良裘得先生卷嘆以爲今士寡雙而主司不見省先生無幾微尤憾假裝亟歸歸八日卽病病八日以歿嗚呼昌其文而晦其遇天之待先生者薄歟抑其厚之也先生之教人也巽而善入一節之長擊賞不置口或怠于學至流涕相告誡經其指授莫不得氣以去掇科第者如拾地芥其他爲學官弟子者尚數十人余年弱冠猶隨諸童子試有司遊先生之門得盡讀兩京以上之書每一文出先生恒詡于人曰浙固才士淵藪後生英絕領襲之者乃出我門下余固知先生蓋過爲

獎借之辭乃其所以不敢暴棄者亦以此先生之論文也與俗師異曰人亦有言曰絢爛歸于平淡此殆爲才餒學儉者解慙也古有絢爛之文無平淡之文今人不知乃取其所絕不經意者而以爲絢爛之所歸是直爲自便之計而實不見古人左氏負浮誇之目莊周有荒唐之鳴賦家以沈博絕麗見稱史才以文膽事詳爲貴唐之謚文者有三曰韓曰白曰權類皆磅礴鬱積怪奇偉麗以恢廓其議論未有柔聲曼骨而卒能名世者宋儒可與說書難與持變聞者驚怖其言而卒無以難之爲文不妄下筆每獲一義鏤而不舍必曲折詳達以盡



其隱立言靳爲可傳能傳之者在其後人而先生未嘗  
自表襮也先生事親孝與人信不爲譎譎之行介而有  
守方大母在堂尊人客遊京師曲致甘脆之奉補衣惡  
食卑居徒步自待未嘗踰侈親串以急告藥石之資棺  
槨之費傾囊橐與之無難色其篤于古處類如此生于  
某年月日歿于某年月日年五十有八娶某氏有子曰  
庭芝能世其學以余從先生有年能悉先生行事千里  
緘書走使來告曰昔宋濂能傳吳立夫而黃楚望之行  
狀出自趙訪先君子學成而業未竟微子辭則恐其勿  
有耀也是不可以已訃旣告門下士畱京師者戴章甫

陸嘉穎陸秩陸宗楷孫廷槐周贊爲位于僧寺設奠望  
祭行哭失聲退而駿乃序次先生所爲可傳者以慰其  
孤以告世之不盡知先生者謹述